

Bertoko haragia, kalitatezkoa

LABURREAN

Baserriko okelaren kontsumoa bultzatzea izan da Haragi Egunaren helburua


Haragi Eguna ospatu zen atzo Tolosan. Euskal Herriko Nekazarien Elkartasunak eta Harakinen Federazioak antolatutako ekitaldian baserriko okela goxo eta kalitatezkoa dastatzeko aukera izan zen. Bertoko haragiaren kontsumoa bultzatzea da ekimenaren xedea. Izan ere, labelaren politikak ekoizten den okelaren % 25 bakarrik biltzen du, eta motz gelditzen da helburu horretan.

M. ARREGI / DONOSTIA

Eguraldia lagun izan ez bazuten ere, jende ugari bildu zen atzo Tolosan Haragi Egunean. 'Kalitatezko haragia, Euskal Herriko baserrien ezaugarria' lelopean egin zen EHNEk eta Harakin eta Txarkuteroen Federazioak Tolosako Udalaren babesarekin antolatutako ekimena.

Bertoko haragiaren kontsumoa bultzatzea da ekimen honen eta aurreko egunetan Tolosan bertan izan diren jardunaldien helburua. EHNEko ordezkariak atzo azpimarratu zuten, «gure haragiaren errekonozimendua lortu, eta era berean kontsumoa bultzatu nahi dugu».

Joan den ostegunean kontsumitzaileak, produktoreak eta banatzaileak bildu zituzten antolatzaileek mahainguruan. Kalitatea, prezioak eta abar izan zituzten mintzagai, eta izandako partaidetzarekin gustora zeuden EHNEko kideak. Atzo txekorraren erakusketa, haragi zati, ezberdinei buruzko azalpenak eta bideo emanaldiak izan ziren eguerdi partean Tolosako Trianguloan. Gainera, gastronomi elkarte



Eguraldia eskasa izan zen arren, arrakastatsua gertatu zen Tolosako Haragi Eguna.

ANDER GILLENEA

artean okela frijitu lehiaketa egin zuten eta Txinparta elkarteak izan zen irabazlea. Bertara inguratu zirenek izan zuten haragi hau dastatzeko aukera.

EHNEko partaideen arabera, azken egunetako ekimenak «hasiera» izan dira bertako haragia identifikatzeko bidean. Gaur egun Eusko Jaurlaritzako Nekazaritza Sailak bideratu duen kalitatezko haragia ezberdintzeko etiketaren politikak ez du baserrietan ekoizten den okela guztia biltzen, ez da % 25era iristen, EHNEko iturrien arabera. Ho-

rregatik Euskal Okela labela benetako identifikatzaile eta kontsumo bultzatzaile izatetik «urrun» dagoela deritzo nekazarien sindikatuak. «Horregatik hemengo haragiaren identifikaziorako bidean jarraitu nahi dugu».

Gainera, EHNE ez dago ados labelaren funtzionamenduari, produktoreen partaidetza «oso urria» dela uste baitu. Gainera prozesua «oso motela» dela salatu du baserriarren elkarteak.

Milioi bat kilo behi haragi baino gehiago saldu dira dagoe-

neko Euskal Okela kalitatezko labelarekin. Duela hamaika hilabete jarri zen martxan kalitate etiketa hau. Guztira Euskal Autonomi Elkarteko 950 produktorek saltzen dute labela duen okela, eta berau 108 haragitegitan saltzen da. Datozen hilabeteotan harategi gehiagori emango zaie labela duen okela saltzeko baimena.

Dena den, haragiaren merkatuaren % 70 kanpotik ekartzen den okela merkeak eta kalitate eskasekoak betetzen duela salatu du EHNEk.

BILBOKO BURTSA

Inbertsoreak ez dira fio

BILBO

Gora-beherak nagusitu badira ere, astea 4,43 puntuko igoerarekin amaitu du Bilboko Burtzak. Egoera gora-beheratsua aprobetxatu du zenbait inbertsorek posizioak indartzeko merkatuan, burtzak gora noiz egingo zain. Horrek azken ekitaldian aurreko eguneko beherakadatik erreperatzea ekarri du. Balore merkatuko prezioek astean zehar izan duten merkatzeak erakarri ditu azkenean inbertsoreak. Dena den, zuhurtasuna izan da burtzak aste honetako ezaugarri nabarmenena. Erosketa batzuk bai, baina inbertsoreak ez dira gehiegi animatu.


Dolarrak eta zor publikoak hasi baino hobeto amaitu dute astea, eta honek pixka bat anima-

tu ditu burtzak astea bukatzean.

Hala ere, aste amaierako igoera ez da hartu behar burtsek hartu duten norabidetzat. Hiruhilabeteak amaitu da irailarekin batera, eta data hau beren karterak antolatzeko aprobetxatzen dute inbertsoreak. Biharko ekitaldian merkatuek izango duten bilakaera ikusi beharko da goranzko joera sendotu den ala ez esateko.

Astea jaitziera handiarekin hasi zuen Bilboko balore merkatuak, bost puntu galdu baitzi-

tuen. Dolarraren egoera ez zen inbertsoreak erostera animatzeko modukoa, egonkortasun faltagatik. Horrela, salmentekin eta erosketarik gabe hasi zen astea Bilboko Burtzan. Bizkaiko merkatuak nolabaiteko erreakzioa izan du astea aurrera joan ahala. Dena den, dirua zuhur mantentzen da, eta dolarrak ezartzen duen erritmoan egiten dute dantza burtsek. Nazioartean balore merkatuak moneden arteko gora-beheren beldur dira, 'ekaitz monetarioaren' beldur, alegia.



PETRONOREN hiru eguneko grebara deitu dute

Petronorreko enpresa batzordeak hiru eguneko greba deialdia egin die langileei «zuzendaritzak hitzarmen kolektiboa betetzen ez duela salatzen». Muskizko findegiko langileek zein Areetako bulegoetakoek hilaren 6tik 9ra bitartean greba egingo dute, aurretik arazoa konpontzen ez bada. Petronorren bi lantokiotan 750 beharginek egiten du lan. Arrazoi berberagatik arazoak izan zituzten abuztuan ere.

RENFEK Cargo Expres zerbitzua kenduko du

Renfe tren konpainiak Cargo Expres zerbitzua kentzea erabaki du «errentagarritasun urriagatik». Enpresa publikoko iturriek azpimarratu dutenez, kenduko den zerbitzuan lan egiten zuten pertsonak beste lanpostu batzuetan jarriko dituzte. Paketeria zerbitzuen artean dagoen lehiaren eraginez, Renfek merkatu kuotaren % 1,4 besterik ez du izan.

MERKATARITZA untziek istripu gutxiago

Aurtengo lehen sei hilabeteetan behera egin du mundu mailan merkataritza sektoreko untzien istripu kopuruak. Lan istripuotan hildako itsas merkataritza sektoreko langileei dagokienez ere, kopurua asko jaitsi da. Aurtun urtariletik ekainera bitartean 225 langile hil dira eta iaz epe berean 1.478 zendu ziren. Untzien segurtasun neurriak ere gero eta gehiago zaintzen dira.

GAS Euskadik Aenor kalitate agiria lortu du

Gas Euskadi konpainiak Aenor ISO 9001 kalitate agiria lortu du. EVE energi talde publikoan egiria lortzen duen hirugarren konpainia da, Naturgas eta Gasnalsaren ondoren. ISO 9001 agiriaren bitartez, Gas Euskadik diseinu, fabrikazio, kontrol, instalazio, mantenimendu eta bezeroarekiko ardura baldintzak betetzen dituela egiaztatzen du Aenorrek.

ADOS

Soluciones Software

Lasarte (Gipuzkoa),
Tfno: 37.04.12
Fax: 37.24.03

Zerbitzuak

AHOLKULARITZA

GESTIO DOKUMENTALA

KONEKTIBITATE PLANAK

Gestioa

APIDA+®

ADONIX®

HAGA®

165 urte
soluzioak eskaintzen